

La lavur da lobby cumenza

■ (rtr) La regenza ha preschentà sia missiva tar la revisiun totala da la lescha per promover la cultura. Ils exponents da la cultura che n'èn betg dal tut d'accord cun la missiva cumenzan cun la lavur da lobby. Dapi la gievgia èn enconuschents ils detagls dal messadi per la nova lescha per la promoziun da la cultura. E las emprimas reacziuns dals exponents da differentas branschas da la cultura èn detg bunas, dentant... Quei che la lescha haja manchentà saja – per exempel tenor *Nikolaus Schmid*, l'actur da film e teater e president da l'ACT, l'Uniun per teatristas libers dal Grischun sco er per la directura dal Teater da Cuir *Ute Haferburg* – da far centers da cultura regiunals. L'intendant da l'Origen Festival Cultural *Giovanni Netzer* è da l'opiniun che la lescha avessia stuì far meglras cundiziuns per che la cultura survegnia dapli daners da promoziun. Cunquai ch'il cussegl grond ha cun debattar sur da la nova lescha il favrer 2017 il davos plaid en chausa èn

ils exponents per part gia sa mess en posiziun per far lavur da lobbying. Nikolaus Schmid ha gia fundà ina grupp cun commembers da differentas uniuns culturalas, profis e laics, che vegnan uss ad elavurar in palpiri cun in giavisch communabel per mauns dals deputads dal cussegl grond. Tar sia revisiun n'haja ella betg mo resguardà la dumonda da «posiziunar nov la promoziun chantunala da la cultura», mabain era las ulteriuras incumbensas ch'èn resultadas dal cussegl grond e da la refurma da territori, scriva ella en ina comunicaziun. Tant la lescha per promover la cultura (en vigur dapi ils 28-09-1997) e l'ordinaziun tiers (dapi ils 12-01-1998) sajan sa cumprovas en blers secturs, scriva la regenza en sia comunicaziun a las medias. Perquai sajan intginas regulaziuns vegnidas surpigliadas en il sboz nov. Explicitamain nov saja tenor la regenza da vulair integrar il sustegn da la lavur culturala professiunala en las finamiras da la lescha. En

pli vul la regenza obligar las regiuns da metter a disposiziun ina purschida cumplexsiva da scolas da chant e da musica. Quai vul dir: Per las regiuns e per il chantun dat quai custs supplementars da 410 000 francs (per las regiuns) e 550 000 (per las vischnancas). Dal rest n'è betg previ che la lescha chaschuna dapli contribuziuns finanzialas. 160 participantas e participants hajan s'express tar la consultaziun. «Blers giavischs» dad els hajan pudi vegnir integrads en il sboz preschentà, scriva la regenza. En pli sajan vegnids resguardads ils resultats da l'incumbensa Caduff (concernent ina pausa tar la revisiun totala da la lescha per il svilup economic) e l'incumbensa Montalta (concernent l'elavuraziun d'in concept chantunal per promover e per finanziair ils museums regiunals ed ils centers da cultura regiunals). En il sboz duai la regenza er vegnida obligada da far in concept cumplexsiv davart la promoziun da la cultura en il chantun Grischun.